



Uunga siunnersuut: Nioqqtissanik eqqussuinermi akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xXx 2015-imeersoq..

(Aningaasaqarnermut Aatsitassanullu Naalakkersuisoq)

(Siullermeenera)

Uani eqqartorparput siunnersuut 2016-mi Aningaasanut Inatsimmut atatillugu ilaannakoortumik isumaqatigiissummut ilaasoq, Siumup Atassutip aamma Demokraatit isumaqatigiissutaannut.

Demokraatini aalajangiusimajuarsimavarput pisortat ingerlatsiviini sipaartoqarnissaa pitsanngorasaasoqarnissaaalu aalajangisumassallutigit akitsuusersuinerit pinngitsoortikkumallugit. Isumaqatigiissuteqarnikkut qularnaarparput pisortat ingerlatsiviini ingerlaavartumik annikillilerisoqarnissaa aamma innuttaasunut qularnaarparput akissarsianut akileraartup uani qinigaaffimmi ingerlasumi qaffanneqassanngitsoq. Tamatuma saniatigut suleqataaffigaarput neqinut akitsuutip taamatullu ikummatissanut akitsuutip eqqunneqartussatut siunnersuutigineqaraluartut piviusunngortinngitsoornissaat. Tamanna perrualaarutigaarput.

Siunnersuummi uani nioqqtissat sukkullit, qormoroortartut tuballu ilaasa eqqunnerini akitsuutip qaffannissaa pineqarpoq. Allatut oqaatigalugu akitsuutit pineqartut inooriaatsip naleqqussarneqarneranut sunniuteqassapput, naatsorsuutigineqartariaqarporlu, innuttaasut tupatornerat sukkutornerallu appassasoq. Tamanna innuttaasut peqqissusaannut kusanartumik kinguneqassaaq.

Siunnersuutip Aningaasaqarnermut- Akileraartarnermullu Ataatsimiititaliami oqaluuserineqarnissaa innersuupparput.